

Tambe a probecha di despedi di Fiscal Mayor mr. Peter Blanken

Orden di Abogadonan a yama Huez Arubiano "bon bini"



ORANJESTAD (AAN): "Pa mi ta un berdadero honor di por dirigi mi mes na Bo awe como Edelachtbare mevrouw Engelbrecht", asina mr. Lincoln "Dello" Gomez, Decano di Orden di Abogadonan di Aruba a inicia su discurso den sala di Corte diabierna ultimo, na ocasion di instalacion di un

Hues nobo di nos Corte Comun di Caribe Hulandes. Mr. Naftali Engelbrecht a huramenta recientemente dilanti Gobernador di Aruba y diabierna instal'e y present'e oficialmente durante un ceremonia special den sala di Corte.

Pa Orden di Abogadonan di Aruba, ta un berdadero honor di



por conta cu un adkision asina importante y valioso pa e Poder Hudicial di nos pais. Decano, mr. Dello Gomez a felicita Hues mr. Naftali Engelbrecht cu e logro importante aki den su carera profesional y a dese'e hopi forza y sabiduria den checucion di su

funcion nobo.

Un bon relacion entre Orden di Abogadonan di Aruba y e Poder Hudicial ta masha importante pa tur y como tal Orden di Abogadonan a asegura di lo haci tur nan esfuerso pa sigui aporta na e bon relacion aki y hasta di por sigui desaroya e relacion mihó ainda.

Pa e Decano di Orden di Abogadonan di Aruba, mr. Dello Gomez, no solamente e ta yamando un Hues nobo bon bini den e Poder Hudicial di nos pais, pero tambe e ta yamando bon bini na un ex-Colegiano, un ex estudiante di e mesun tempo cune y un ex colega. Hunto nan e studia na Colegio Arubano, nan a studia hunto na Universidad di Aruba y despues a traha algun tempo hunto na Ministerio di Finansa. "Esey ta haci mi mas orguyoso ainda di por dirigi mi mes na Bo como edelachtbare", asina mr. Dello Gomez a enfatisa.

"Tambe mi ta sigur cu for di shelo bo tata Manchi Engelbrecht awor tin un sonrisa grandi riba su cara y ta yen di orguyo mirando su yiu muhe instala como Hues", asina Decano di Orden di Abogadonan di Aruba a dirigi su mes na e Hues nobo, memey di tur e invitadonan y miembronan di e Poder Hudicial di nos pais.

Mr. Naftali Engelbrecht ta bira e di tres Hues formando parti actualmente di Corte na Aru-



ba, banda di Hues mr. Angela y Hues mr. Yarzagaray. Asina poco poco mas hurista Arubiano ta haya interes den e funcion honorabel aki, di por interpreta ley y dicta sentencianan.

A probecha e ocasion tambe pa tuma despedida di mr. Peter Blanken como Fiscal Mayor na Ministerio Publico di Aruba. Orden di Abogadonan ta contento di por a conta semper cu un bon cooperacion cu e Fiscal Mayor y como tal a dese'e tur cos bon den su carera.

Orden di Abogadonan di Aruba ta estableci desde aña 1991 y ta un asociacion di abogadonan cu ta herce nan profesion na Aruba. Aruba tin mas cu 100 abogado trahando den mas o menos 45 bufete. Mayoria di e abogadonan ta miembro di Orden di Abogadonan di Aruba, maske cu e miembresia, contrario na locual ta e caso na Hulanda, no ta obligatorio. Meta di e asociacion aki ta di promove administracion di husticia y siguridad huridico na Aruba.